

校史隨筆

張元濟著

臺灣商務印書館印行



人人文庫

張元濟著

校史隨筆

臺灣商務印書館發行

編印人人文庫序

余弱冠始授英文，爲謀教學相長，並滿足讀書慾，輒廣購英文出版物。彼時英國有所謂人人叢書 *Everyman's Library* 者，刊行迄今將及百年，括有子目約及千種，價廉而內容豐富，所收以古典爲主，間亦參入新著。就內容與售價之比，較一般出版物所減過半。其能如是，則以字較小，行較密，且由於古典作品得免對著作人之報酬，所減成本亦多。

余自中年始，從事出版事業，迄今四十餘年，中斷不逾十載。在大陸時爲商務印書館輯印各種叢書，多厲廉售之意，如萬有文庫一二集，叢書集成初編以及國學基本叢書等，其尤著者也。民五十三年重主商務印書館，先後輯印萬有文庫薈要，叢書集成簡編，漢譯世界名著甲編等，一本斯旨。惟以整套發售，固有利於圖書館與藏書家，未必盡適於青年學子也。

幾經考慮，乃略仿英國人人叢書之制，編爲人人文庫，陸續印行，分冊發售，定價特廉，與人人叢書相若；讀者對象，以青年爲主，則與前述叢書略異。本文庫版本爲四十開，以新五號字排印，與人人叢書略同；每冊定價一律，若干萬字以下，或相等篇幅者爲單冊，占一號；超過若干萬字或相等篇幅者爲複冊，占二號，皆依

出版先後編次。每號實價新臺幣八元，一改我國零售圖書向例，概不折扣。惟實行以來，發見間以萬數千字之差，售價即加倍，頗欠公允。研討再四，決改定售價，單號仍爲八元，雙號則減爲十二元，俾相差不過鉅。又爲鼓勵多購多讀，凡一次購滿五冊者加贈一單冊，悉聽購者自選。區區之意，亦欲藉此而一新書業風氣，並使購讀者得較優之實惠而已。

仰今後重印大陸版各書，除別有歸屬，或不盡適於青年閱讀者外，當盡量編入本文庫。同時本文庫亦儘可能搜羅當代海內外新著，期對舊版重印者維持相當比例。果能如願，則本文庫殆合英國人人叢書與家庭大學叢書 Home University Library 而一之也。

數年之間，取材方面，時有極合本文庫性質，徒以篇幅過多，不得不割愛者，因自五十八年七月起新增特號一種，售價定爲二十元，俾本文庫範圍益廣，而仍保持定價一律之原則。惟半年以來，紙價工價均大漲，祇得將特號面數酌予調整。凡初版新書，每冊在二百一十面至三百面者，或景印舊版，每冊在三百一十面至五百面者，均列入特號，事出不獲已，當爲讀書界所共諒也。

中華民國五十九年一月五日王雲五識

序言



歲在辛未上海涵芬樓彙集宋元古本及明槧舊鈔影印二十四史至丁丑歲而訖功蓋自乾隆武英殿敕刊之始洎同治五局合刻以來括舉全史而整齊之竟克奏無前之偉績然其間厲精淬掌始終不懈以底於成者實前輩張君菊生一人之力也君自刊印伊始卽獨任校勘之役每一史成輒綴跋文於後臚版刻之源流舉文字之同異恆與前賢相發明或引今時之創獲其致力之精能記問之賅博海內人士披觀而服習之久矣間嘗語君書成之後宜仿子晉題跋羣圖書錄之例取諸跋勒爲一編以餉學者其校記彙本亟宜刊布以竟全功未幾以校史隨筆來謂全稿紛繁董理有待茲撮其領要萃爲此編屬爲序而行之竊惟史籍浩繁號爲難治近代鴻箬無如王氏商榷錢氏考異趙

氏劄記三君皆當代碩儒竭畢生之力以成此書其考辨精深徵引翔實足爲讀史之津寄然於疑誤奪失之處或取證本書或旁稽他籍咸能推斷以證其乖違終難奮筆以顯爲刊正則以未獲多見舊本無所取證也第舊本難致白昔已然錢氏曉徵博極羣書然觀其舊唐書考異言關內道地理於今本多所致疑似於聞人詮本未全寓目明刻如此遑論宋元更以近事言之合州張石卿亦吾蜀好學之士嘗侈言欲重勘全史持書徧謁勝流共和之初遇之海上告以欲校古書宜先求善本否則勞而鮮獲壯志難酬石卿不喻斯旨矻矻廿年取材之書不越殿本局刊再上汲古北監而止年踰七十於遷史始見震澤王氏本身後以遺稿見託則疏失孔多未堪問世追惟往事深足矜憐可知校勘之事良未易言博求廣覽得所據依斯可循流以溯源庶免冥途而闇索也今觀隨筆所載凡一百六十四則視原稿當不及十之一而博識雅裁洪纖畢

舉凡所疑窒悉爲疏通而證明遇有舛訛得以隨文而匡正至於逸文奪葉亦皆援據衆本廣采旁蒐期於信今而傳後其詣力所到時與王錢諸人之說互相闡發而精審且或過之蓋君所采獲者皆前人未見之書故其論定者多千古未發之覆閱之關開節解如薙叢棘而履康莊撥霧翳而覩晴昊其開示後人之功夫豈細哉昔王氏序商榷有言曰予任其勞而使人受其逸予居其難而使人樂其易不亦善乎今茲編既出世之讀史者固已受其逸樂其易矣豈知其難且勞者至如是耶當剏議之初或疑古本傳世日稀諸史頗難求備且卷帙繁重沿襲滋紛造端既閎殺青匪易君獨奮厲圖維引爲己責招延同志馳書四出又復舟車遠邁周歷江海大都北上燕京東抵日本所至官私庫藏列肆冷攤靡不恣意覽閱耳目聞見籍記於冊海內故家聞風景附咸出篋藏助成盛舉於是廣羅衆本拔取殊尤遠者寫倣以歸近者投瓿見假而編排待

定端緒至紛宋刻舊少完編則別徵殘卷祕籍世不再出則取資覆刊一史而
同備數刻必錄其古者無刻而兼用傳鈔必選其精者或合併異刻乃完一書
或續獲初鐫而棄前帙凡此甄擇之功皆再三矜審而始定舉其大較言之如
黃氏史記遍訪之諸家卷第粗完三國志遠求之海外二志始備晉唐兩書皆
密行細字或闕或殘圖禮別本同式可云巧合至舊唐宋刊取之瞿氏宋史元
刊得之內閣推爲斷種孤籍此外片楮不存一則續以沈本一則續以朱本牽
補經管強彌缺憾若薛史原書懸購國門而不得周書蜀本猝遭劫火而竟亡
此則補救無方徒懸夢想而已此成書之難非盡人能喻者也若夫檢正編帙
浩博無涯今既取精而用宏加之實事以求是凡覲古刊取正官本旁參衆刻
廣核羣書芟亂截浮之文殆更僕而難數聊就所見舉其大凡如校史記而知
正義集解之文遺佚正多校漢書而知劉之問引宋祁之語要可取信校晉書

則知盧氏校補率與相符校金史則知施氏詳校尙有未盡校五代史益知吳氏纂誤王氏商榷咸以未覩慶元曾本橫生糾摘茲根據既確斯榛梗悉除又列史舊多闕文今得宋元初本補南齊地志列傳二葉宋史張栻田況傳二葉而奪行衍文更難僂指若夫片語單詞形音易舛而一字偶失千里遂差如南齊紀口中出血展轉誤作舌言梁書紀儁進士囊同逆乃遣王偉罪狀出入得此究明鳴衣爲隋后采桑之服今作鳴衣者皆誣鉤魚爲遼主游畋之禮今作釣魚者大失獲此孤證幸存典章至魏書九磬之舞北史錫衰之服遼史灼者之人皆引證周官以糾正時本凡此斟餘之瑣語足備前代之遺聞設令不予標稱遂恐長茲湮滅然非雌黃萬卷穿穴羣言又何以臻此此校史之勞非旦夕可幾者也嗟夫文籍顯晦要有數存盛業聿興亦關人力當乾隆之世文治脩明才俊蔚起殿閣刊書宜可勒垂定本而流傳及今尙多遺議曾文正手造

中興首敷文教廣開書局賓禮耆儒而全史重刊未爲精善留此鴻功俟諸今日君乃乘時而起肩斯鉅任適會世運日新禁網大弛上而天府之珍儲下而世家之祕庫西泊於流沙東極於蓬島地不愛寶奇書盡出加以歐風東被藝術精奇毫素之用蛻以化工剗剗之勞易以石墨此皆前世所未經而於今爲極盛君乘此機緘恢張文運奮其偉力運以精思計日程功听夕忘倦中更禍亂茹苦支持不越十年而煌煌數萬葉鉅編傳播於海寓內外茲更出其緒餘刊此校筆如開萬寶之庫傾龍宮之藏片玉零珠皆爲瑰異洵乙部之總龜非僅丹鉛之餘錄也自維學殖荒落垂老無成祇以嗜古耽書與君氣誼相合投分遂深憶刊史之初引共謀議參訂版本相與訪尋并盡出家世藏書如宋刻則有史記魏書南齊書唐書五代史元刻則有遼金北史雖缺完不一而罕異爲多樂在觀成未容祕惜第慙疏譎無所裨助君乃殷勤商討箋札時通每撰

一文輒千里郵示遇有疑滯時獲新解亦舉相質正余惟拾墜補遺聊抒一得而已嘗聞摹印初稿悉經手勘三四未已偶以數卷見投觀之朱墨爛然盈闕溢幅密若點蠅繁如赤練點畫纖細鉤勒不遺知君堅毅劬苦迴越恆人遂能成茲偉著故於是書之成也敢述經始之難與圖成之勞表君生平志事以告當世而余亦藉以附名簡末其爲幸不旣多乎戊寅臘月十八日江安傅增湘

自序

曩余讀王光祿十七史商榷錢宮詹廿二史考異頗疑今本正史之不可信會禁網既弛異書時出因發重校正史之願聞有舊本展轉請託就地攝影影本既成隨讀隨校有可疑者輒錄存之每畢一史卽摘要以書於後商務印書館既覆印舊本行世先後八載中經兵燹幸觀厥成余始終其事與同人共成校勘記百數十冊文字繁冗亟待董理際茲世變異日能續印否殊未敢言友人傅沅叔貽書屬先以諸史後跋別行余重違其意取閱原稿語較詳盡更摘如干條用活字集印備讀史者之參證管蠡所及詎敢望王錢二子之什一亦聊師其意而已民國紀元二十有七年九月海鹽張元濟

目錄

史記

三家舊注

三家注刻本

三家注覆刻本

震澤王本之訛奪

王本正義不全

殿本正義多遺漏

監本大刪三家注

諡法解應用兩排讀法

漢書

景祐本之由來

景祐本之遞嬗

景祐本爲見存最古善本

顏師古敍例

文字增損均勝時本

錢大昕攷異可信

古今人表

正文注文錯簡

殿本從劉之間刊本出

宋祁校語各本非捏造

宋祁校語多可采

後漢書

紹興監本

避宋諱特嚴

志不當夾入紀傳間

劉昭注范書紀傳不傳注司馬志

獨傳

注語入正文附傳跳行均誤

劉敞所刊誤字不誤

蔡邕石經存毀之數

三國志

衢州本爲上建本次之

殿本卷第淆亂

三志單行本

殿本考證訛字可信

時本譌文衍文奪字俗字均可矯正 古寫本之異同

晉書

宋刊小字本有二

盧抱經校帝紀與宋本合

袁甫鄭方二傳跳行未添題

宋書

卷末疏語

少帝紀史臣論猶有遺文

蜀大字板在南宋時入浙

武帝名均作諱字

殿本誤註爲正文

闕文不當臆補

南齊書

治平開板牒文

眉山重刊本

卷末疏語

補闕二葉

舌中血出

地名脫誤

荀平荀平

梁書

卷末疏語

宋本多墨丁空格

避唐諱諸字

王偉彭儁進士囊

宋本闕文

陳書

避陳諱及唐諱

卷末疏語

大予太子

哥歌

錢氏攷異可信

時本誤補墨丁

魏書

宋本久湮

華陽葉氏藏宋本

卷末疏語

宋本闕文較少

殿本考證有誤

宋本亦有闕誤

司馬進司馬遜

九磬九聲

北齊書

卷末疏語

汲古本闕葉

時本多訛字

因刊誤而愈誤

與北史互有異同

傳次互異

睦睦之辨

殿本增補字句據北史

周書

避周諱及唐諱

卷末疏語